



Sesida dal

Communitgà ils

Protocol nr.

1. da settember 2020

7 da settember 2020

707

Dumonda Rutishauser

concernent COVID-19 cun accent sin las chasas da persunas attempadas e da tgira

Resposta da la Regenza

En las chasas da persunas attempadas e da tgira grischunas n'hai betg dà surproportiunalmain blers cas d'infecziun e mortoris. La Regenza respunda las dumondas concretas sco suonda:

Tar la dumonda 1: Las datas accessiblas publicamain sin la pagina d'internet dal chantun infurmeschan davart il dumber total d'infecziuns sco er da mortoris per regiun. Per ils 27 d'avust 2020 hai dà **82 infecziuns** cun COVID-19 sco er **28 mortoris** d'abitantas e d'abitants infectads cun COVID-19 en las chasas da persunas attempadas e da tgira dal chantun Grischun. Ina specificaziun pli detagliada sco per exempel la classificaziun dumandada qua tenor infecziuns en chasas da persunas attempadas e da tgira n'è betg pussaivla per motivs da la protecziun da datas.

Tar la dumonda 2: Ils motivs per la derasaziun al cumenzament èn evidents: a l'entschatta da la pandemia mancava dapertut la savida co ch'ins sto – ord vista medicinala – ir enturn cun in virus nov e la smanatscha n'è per part betg vegnida prendida seriosa avunda. Suenter l'introducziun da las mesiras restrictivas ed en spezial suenter la realisaziun consequenta da reglas d'igièna, d'isolaziun e da quarantina èn las novas infecziuns sa reducidas en general fitg svelto. Las chasas da persunas attempadas e da tgira en il Grischun han realisà consequentamain e cun success las prescripziuns ch'èn vegnidas adattadas e meglieradas permanentamain.

Tar la dumonda 3: Las lavurs per analisar e per elavurar posteriuramain l'uschenumnada "emprima unda" da la pandemia COVID-19 èn gia vegnidas prendidas per mauns il matg 2020 sa basond sin las enconuschientschas ch'èn vegnidas nudadas d'in cuntin. Per dumagnar la lavur che resulta en connex cun COVID-19 (dumondas medicinalas specificas, contact tracing, post d'annunzia per arrivs da l'exteriur, servetsch giuridic, comunicaziun) ha la Regenza ultra da quai installà l'avust 2020 ina

partiziun COVID-19 tar l'Uffizi da sanadad. Quella vegn ad ademplir sia incumbensas per entant fin la fin da l'onn 2020 en la dimensiun da la lavur necessaria. Concernent la planisaziun en cas d'ina pandemia ha la Regenza incumbensà l'Uffizi da sanadad da repassar totalmain il plan da pandemia. Ch'i pudess dar er en il futur stretgas tar las resursas en cas d'ina pandemia da questa dimensiun, na sa lascha probablmain betg impedir. Las instituziuns èn vegnidas incumbensadas gia tenor il plan da pandemia vertent e vegnan er ad esser incumbensadas tenor il plan da pandemia futur da tegnair sin reserva il material da protecziun necessari en ina dimensiun suffizienta e d'economisar questa reserva correspondentamain.

Tar la dumonda 4: Cun las premissas actualas sa chatta il plan directiv da plazzas gia sin il stgalim 2 da la scala da la qualitat da tgira (stgalim da qualitat da la tgira: 0 = tgira privlusa, 1 = tgira segira, 2 = tgira adequata, 3 = tgira optimala). Cun questas premissas è la cumpetenza professiunala avant maun en tut las chasas da personas attempadas e da tgira. L'adempliment da las premissas persunalas (plan directiv da plazzas) vegn ultra da quai controllà da l'Uffizi da sanadad mintga quartal per garantir ch'igl è pussaivel da dumagnar ina pandemia sin basa da la qualitat da las structures avant maun. Correspondentamain n'è in'adattaziun dal plan da plazzas betg necessari en ils egls da la Regenza.

Tar la dumonda 5: In concept da protecziun che vala per tut las instituziuns na para betg dad esser raschunaivel, perquai ch'in concept da protecziun po sviluppar ses effect mo, sch'el è adattà a las relaziuns individualas da l'instituziun singula. Pervia da quai èn las chasas da personas attempadas e da tgira vegnidas supplitgadas da la Regenza ils 26 da matg 2020 da repassar lur concept da protecziun individual resguardond las enconuschientschas las pli actualas e la smanatscha specifica tras COVID-19 per lur instituziun. Tut las chasas da personas attempadas e da tgira en il chantun Grischun han inoltrà sin quai lur concept da protecziun repassà a l'Uffizi da sanadad. En il rom da controllas casualas èn vegnidas communitgadas eventualas contestaziuns a las chasas da personas attempadas e da tgira.



En num da la Regenza

Il president:

Dr. Chr. Rathgeb

Il chancelier:

Daniel Spadin